

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : DATO' SRI LIOW TIONG LAI [BENTONG]

TARIKH : 16 JUN 2014 (ISNIN)

SOALAN : 71

DATO' SRI LIOW TIONG LAI [BENTONG] minta **PERDANA MENTERI** menyatakan apakah insentif-insentif yang diberikan oleh Kerajaan bagi menarik balik pekerja mahir pulang ke tanah air untuk berkhidmat. Adakah usaha-usaha yang dijalankan oleh Talent Corp mendapat sambutan yang baik dan berapakah jumlah mereka yang pulang ke Malaysia mengikut bidang kerja.

JAWAPAN: YB SENATOR DATO' SRI ABDUL WAHID OMAR,
MENTERI DI JABATAN PERDANA MENTERI

Tuan Yang di-Pertua,

1. Selaras dengan usaha Kerajaan Malaysia menerajui pelaksanaan Program Transformasi Kerajaan (GTP) dan Program Transformasi Ekonomi (ETP) ke arah ekonomi berpendapatan tinggi, Talent Corporation Malaysia Berhad (TalentCorp) melalui ***Returning Expert Programme (REP)*** bertindak untuk memudahcara kepulangan tenaga mahir Malaysia di luar negara bagi memperkasa usaha memenuhi keperluan bakat sektor utama ekonomi negara.

2. Pemohon yang diluluskan melalui program tersebut akan menerima pakej insentif yang telah ditambahbaik sejak diterajui oleh TalentCorp. Berkuatkuasa bermula 16 April 2014, pakej insentif terbaru adalah seperti berikut:
 - (i) Cukai Pendapatan pada kadar rata 15% berterusan ke atas pendapatan penggajian selama 5 tahun;
 - (ii) Maksimum RM150,000 pengecualian cukai ke atas satu kereta CKD keluaran tempatan atau satu kereta CBU yang diimport sepenuhnya;
 - (iii) Pengecualian cukai bagi semua barangan persendirian yang di bawa ke Malaysia; dan
 - (iv) Kemudahan status taraf Pemastautin Tetap (PR) untuk pasangan dan anak pemohon Malaysia yang keluarganya bukan rakyat Malaysia.

3. Penambahbaikan berterusan ini bertindak untuk menyokong dua aspek penting, iaitu dari segi **kualiti** dan **kuantiti**. Dalam memastikan aspek **kualiti** bagi pemohon yang diluluskan di bawah REP, pemohon REP perlu menepati kriteria yang telah diperhalusi dengan mengambil kira:

- (i) pengalaman bekerja di Malaysia iaitu sebelum bekerja di luar negara;
- (ii) pendapatan di luar negara; dan
- (iii) pengamalan serta kepakaran yang relevan dengan sektor ekonomi atau jurang kemahiran kritikal yang sedia ada.

4. Dari segi **kuantiti** pula, sejak menerajui program ini pada 2011, lebih 2,800 tenaga pakar telah diluluskan melalui program ini dalam beberapa sektor ekonomi utama yang menerajui ETP. Pecahan demografi pemohon yang telah diluluskan adalah terdiri daripada:

Bil.	Lima Bidang Teratas	Lima Sektor Teratas
1	Perbankan	Perkhidmatan Kewangan
2	Perakaunan	Perkhidmatan & Perniagaan
3	Jurutera Mekanikal/ Ahli Geologi	Minyak, Gas & Tenaga
4	Jurutera ICT dan Elektronik	Kandungan & Infrastruktur Komunikasi,
5	Pakar Perubatan	Perkhidmatan Kesihatan

5. Kelulusan permohonan REP yang telah dilaksanakan oleh TalentCorp dari tahun 2011 sehingga 31 Mei 2014 adalah:

Inisiatif	2011	2012	2013	31 Mei 2014
<i>Returning Expert Programme (REP)</i>	680	923	900	355

6. Inisiatif ini diperkukuhkan lagi dengan kolaborasi bersama pemain industri terkemuka negara melalui sesi temuseru (*outreach*) sebagai

usaha menghubungkan tenaga mahir Malaysia di luar negara dengan mengetengahkan peluang-peluang pekerjaan dalam negara. Usaha ini telah mendapat sambutan yang menggalakkan oleh pemain industri terkemuka berdasarkan kepada penyertaan 90 syarikat swasta bagi sesi temuseru luar negara yang telah diadakan sepanjang tahun 2013 di United Kingdom, Australia dan lain-lain negara dengan kehadiran lebih 7,500 rakyat Malaysia di luar negara.

Sekian. Terima kasih.